



Broj: UP-I-KSI-09-34/23

Datum: 24.10.2023. godine

Na osnovu člana 25. stav (1) tačka a) i b), člana 32. Zakona o sprečavanju sukoba interesa u institucijama Brčko distrikta Bosne i Hercegovine („Službeni glasnik Brčko distrikta Bosne i Hercegovine“, broj: 04/21) i člana 25. Poslovnika o radu Komisije za odlučivanje o sukobu interesa („Službeni glasnik Brčko distrikta Bosne i Hercegovine“, broj: 19/21) Komisija za odlučivanje o sukobu interesa, postupajući po službenoj dužnosti, u predmetu utvrđivanja povrede odredaba navedenog Zakona od strane Lj. Đ. iz Brčkog, ulica [REDACTED] broj [REDACTED], člana Upravnog odbora JZU „Zdravstveni centar Brčko“ Brčko distrikt Bosne i Hercegovine, kao nosioca javne funkcije, na 70. sjednici održanoj dana 30.10.2023. godine, donosi

RJEŠENJE

1. **UTVRĐUJE SE** da je Lj. Đ. iz Brčkog, ulica [REDACTED] broj [REDACTED], član Upravnog odbora JZU „Zdravstveni centar Brčko“ Brčko distrikt Bosne i Hercegovine kao nosilac javne funkcije postupila protivno članu 19. i 20. Zakona o sprečavanju sukoba interesa u institucijama Brčko distrikta Bosne i Hercegovine, na način da u Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu izdržavanja-Aneks II, podnesenom dana 11.01.2022. godine Komisiji za odlučivanje o sukobu interesa nije prijavila pokretnu imovinu bračnog druga vrijednosti veće od 5.000,00 KM.
2. **UTVRĐUJE SE** da je Lj. Đ. iz Brčkog, ulica [REDACTED] broj [REDACTED], član Upravnog odbora JZU „Zdravstveni centar Brčko“ Brčko distrikt Bosne i Hercegovine postupila protivno članu 8. stav (1) Zakona o sprečavanju sukoba interesa u institucijama Brčko distrikta Bosne i Hercegovine, na način da je propustila da na drugo fizičko ili pravno lice prenese upravljačka prava udjela u kapitalu privatne zdravstvene ustanove, apoteke „[REDACTED]“ Brčko, u kojem nosilac javne funkcije ima više od 0,5% udjela u kapitalu preduzeća, odnosno 100% udio u kapitalu preduzeća.
3. Za učinjeno kršenje odredaba Zakona o sprečavanju sukoba interesa u institucijama Brčko distrikta Bosne i Hercegovine pod tačkom 1. i tačkom 2. ovog rješenja, Lj. Đ. se shodno članu 43. navedenog Zakona izriče opomena.

Образложење

Dana 25.09.2023. godine, Komisija za odlučivanje o sukobu interesa po službenoj dužnosti je zaključkom, broj: UP-I-KSI-09-34/23 od 25.09.2023. godine, pokrenula postupak za odlučivanje o povredi odredaba Zakona o sprečavanju sukoba interesa u institucijama Brčko distrikta Bosne i Hercegovine protiv nosioca javne funkcije Lj. Đ., iz Brčkog, ulica [REDACTED] broj [REDACTED], člana Upravnog odbora JZU „Zdravstveni centar Brčko“ Brčko distrikt Bosne i Hercegovine jer je posumnjala u tačnost i potpunost podataka u podnesenom Izvještaju o imovinskom stanju na obrascu o imovinskom stanju nosioca javne funkcije, bračnog i vanbračnog druga, djece i drugih članova porodičnog domaćinstva kao i lica prema kojima nosilac javne funkcije ima zakonsku obavezu

izdržavanja-Aneks II, zbog neusklađenosti između prijavljene imovine u Izvještaju o imovinskom stanju, podnesenom dana 11.01.2022. godine Komisiji za odlučivanje o sukobu interesa od strane nosioca javne funkcije i podataka prikupljenih od nadležnih organa i institucija o pokretnoj imovini vrijednosti veće od 5.000,00 KM u vlasništvu bračnog druga nosioca javne funkcije. Nosioc javne funkcije nije u Izvještaj o imovinskom stanju unijela podatke o pokretnoj imovini bračnog druga vrijednosti veće od 5.000,00 KM, i to automobil marke Peugeot, tip: L, registarskih oznaka: [REDACTED] godina proizvodnje: 2020. u vlasništvu bračnog druga I. Đ.

Osim toga, Komisija je pokrenula postupak protiv Lj. Đ. jer je kao nosilac javne funkcije postupila protivno odredbi člana 8. stav (1) Zakona o sprečavanju sukoba interesa u institucijama Brčko distrikta Bosne i Hercegovine radi propusta da na drugo fizičko ili pravno lice prenese upravljačka prava na udjelu u kapitalu privatne zdravstvene ustanove, apoteke „[REDACTED]“ Brčko, u kojem nosilac javne funkcije ima više od 0,5% udjela u kapitalu preduzeća, odnosno 100% udio u kapitalu preduzeća.

Lj. Đ. je na osnovu Odluke Gradonačelnika o imenovanju članova Upravnog odbora JZU „Zdravstveni centar Brčko“ Brčko distrikt Bosne i Hercegovine, broj: [REDACTED] od 30.03.2021. godine izabrana za člana Upravnog odbora JZU „Zdravstveni centar Brčko“ Brčko distrikt Bosne i Hercegovine, te je shodno članu 2. Zakona o sprečavanju sukoba interesa u institucijama Brčko distrikta Bosne i Hercegovine nosilac javne funkcije i upisana je u Registar javnih funkcija i nosilaca javnih funkcija.

Članom 22. Poslovnika o radu Komisije za odlučivanje o sukobu interesa u institucijama Brčko distrikta Bosne i Hercegovine propisano je da je nosilac javne funkcije stranka u postupku.

Uvidom u Izvod iz matične knjige vjenčanih, broj: [REDACTED] od 07.09.2022. godine, utvrđeno je da je Lj. Đ. zaključila brak sa I. Đ. u Brčkom dana 19.12.1981. godine, te je zbog toga obaveza nosioca javne funkcije unijeti podatke o imovini svog bračnog druga u Izvještaj o imovinskom stanju.

Pri provjeri podataka iz podnesenog Izvještaja o imovinskom stanju, Komisija se dana 03.10.2022. godine obratila zahtjevom, broj: KSI-12-279/22-9 Odjeljenju za javni registar-Pododjeljenju za lična dokumenta. Uvidom u odgovor Odjeljenja za javni registar, broj: [REDACTED] od 28.10.2022. godine utvrđeno je da je I. Đ., bračni drug nosioca javne funkcije vlasnik putničkog automobila marke Peugeot, tip: L, registarskih oznaka: [REDACTED], godina proizvodnje 2020.

Nadalje, Komisija se dana 03.10.2022. godine, obratila Osnovnom sudu Brčko distrikta Bosne i Hercegovine-Registru preduzeća zahtjevom, broj: KSI-12-279/22-10 za izdavanje podataka iz njihove evidencije.

Uvidom u dopis i Izvod iz Registra preduzeća, broj: [REDACTED] od 05.12.2022. godine, Komisija za odlučivanje o sukobu interesa utvrdila je da je Lj. Đ. upisana ka jedini osnivač i lice ovlašteno za zastupanje bez ograničenja u zdravstvenoj ustanovi, apoteci, „[REDACTED]“ Brčko distrikt Bosne i Hercegovine.

Nosioc javne funkcije je istim Zaključkom pozvan da Komisiji za odlučivanje o sukobu interesa dostavi izjašnjenje u roku od 15 dana od dana dostavljanja Zaključka.

Nakon prijema Zaključka o pokretanju postupka, broj: UP-I-KSI-09-34/23 od 25.09.2023. godine, zaprimljen 16.10.2023. godine, Lj. Đ., nosilac javne funkcije, je dana 24.10.2023. godine dostavila Komisiji za odlučivanje o sukobu interesa pisano Izjašnjenje u kojem, između ostalog, navodi da je u potpunosti saglasna s pokretanjem postupka, te da u vezi s tim nema nikakvih

primjedbi. Zatim navodi da je do propusta došlo usljed toga što je veoma zaposlena i nije detaljnije bila upoznata sa obavezama propisanim zakonom, te tako nije imala nikakva saznanja o postupku prenošenja upravljačkih prava na drugo lice, kao što joj je bila nepoznata i obaveza unosa automobila M1-marke Peugeot, tip L, registarskih oznaka [REDACTED], godina proizvodnje 2020. godine u vlasništvu supruga prilikom ispunjavanja Aneksa II. Dalje navodi da je odmah po prijemu Zaključka o pokretanju postupka izvršila prenos upravljačkih prava u zdravstvenoj ustanovi, apoteci „[REDACTED]“ na drugo lice.

Kao dokaz navedenim tvrdnjama dostavila je ugovor o prenosu upravljačkih prava od 20.10.2023. godine na fizičko lice, koje nije povezano lice sa nosiocem javne funkcije.

Članom 19. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da je nosilac javne funkcije dužan u roku od 30 (trideset) dana od dana stupanja na javnu funkciju, podnijeti Komisiji Izvještaj, za sebe i bračnog i vanbračnog druga, djecu, druge članove porodičnog domaćinstva kao i lica prema kojima nosilac javne funkcije ima zakonsku obavezu izdržavanja, prema stanju na dan kada je izabran, odnosno imenovan, dok je stavom (2) istog člana, između ostalog propisano i da Izvještaj sadrži lične podatke nosioca javne funkcije i članova njegove uže porodice, uključujući JMB, podatke o funkciji koju nosilac javne funkcije obavlja, dok je tačkom b) istog člana propisano i da sadrži podatke o imovini, uključujući novac, račune u banci, poslovnu dokumentaciju, dionice, vrijednosne papire, obveznice, nepokretnu imovinu, stanarsko pravo i drugu imovinu i dobra u vrijednosti većoj od 5.000,00 KM u Bosni i Hercegovini i inostranstvu.

Primjenom navedenih zakonskih odredaba na utvrđeno činjenično stanje, ocijenjeno je u konkretnom slučaju da postoji povreda odredaba Zakona o sprečavanju sukoba interesa u institucijama Brčko distrikta Bosne i Hercegovine, s obzirom na to da Lj. Đ. nije u Izvještaju o imovinskom stanju podnesenom 11.01.2022. godine Komisiji za odlučivanje o sukobu interesa unijela podatke o vlasništvu nad automobilom marke Peugeot, tip: L, registarskih oznaka [REDACTED], godina proizvodnje: 2020. u vlasništvu bračnog druga I.Đ. čime je postupila protivno članu 19 stavovi (1) i (2) te članu 20. Zakona o sprečavanju sukoba interesa u institucijama Brčko distrikta Bosne i Hercegovine.

Na osnovu navedenog odlučeno je kao pod tačkom 1. dispozitiva ovog Rješenja.

Nadalje, članom 8. stav (1) Zakona o sprečavanju sukoba interesa u institucijama Brčko distrikta Bosne i Hercegovine propisano je da nosilac javne funkcije koji ima 0,5% (nula zarez pet posto) i više dionica, odnosno udjela u kapitalu privatnog preduzeća za vrijeme obavljanja javne funkcije, ugovorom prenosi upravljačka prava na drugo pravno ili fizičko lice u roku od 30 (trideset) dana od dana stupanja na javnu funkciju, koji upravljačka prava vrši u svoje ime, a za račun nosioca javne funkcije.

Primjenom navedene zakonske odredbe na utvrđeno činjenično stanje, ocijenjeno je u konkretnom slučaju da postoji povreda odredbe člana 8. Zakona o sprečavanju sukoba interesa u institucijama Brčko distrikta Bosne i Hercegovine, na način da je propustila ugovorom izvršiti prenos upravljačkih prava, koja proizilaze iz vlasništva nad poslovnim udjelom u kapitalu privatne zdravstvene ustanove, apoteke „[REDACTED]“ Brčko na fizičko lice koje nije s njom povezano lice.

Na osnovu navedenog odlučeno je kao pod tačkom 2. dispozitiva ovog Rješenja.

Član 38. Zakona o sprečavanju sukoba interesa u institucijama Brčko distrikta Bosne i Hercegovine propisuje sankcije za nosioca javne funkcije koji postupi suprotno odredbama navedenog Zakona.

Komisija je, shodno članu 43. Zakona o sprečavanju sukoba interesa u institucijama Brčko distrikta Bosne i Hercegovine, prilikom odlučivanja o vrsti sankcije koju treba izreći u konkretnom slučaju u obzir uzela sve okolnosti kako bi izrečena sankcija odgovarala učinjenoj povredi Zakona vodeći računa o težini i posljedici povrede Zakona. Komisija je posebno cijenila njeno postupanje i odgovornost, ličnost nosioca javne funkcije, odnos imenovane prema kršenju odredaba Zakona, opredijeljenost imenovane da postupi u skladu sa Zakonom, te otkloni razloge koji su doveli do kršenja odredaba Zakona. S tim u vezi Komisija je cijenila činjenicu da je nosilac javne funkcije, odmah po prijemu Zaključka o pokretanju postupka izvršila prenos upravljačkih prava u zdravstvenoj ustanovi apoteka „[REDACTED]“ Brčko distrikt Bosne i Hercegovine, kao i da je o tome obavijestila Komisiju za odlučivanje o sukobu interesa. Nadalje Komisija je cijenila i prouzrokovane posljedice nastale predmetnom povredom Zakona, kao i da se očito radi o lakšem obliku kršenja odredaba zakona koje nisu nanijele štetu integritetu javne funkcije koju Lj. Đ. obavlja, te je Komisija stava da izrečena opomena u potpunosti odgovara težini i posljedicama povrede Zakona.

Komisija je, cijeneći sve dokaze pojedinačno i u međusobnoj vezi, shodno članovima 4., 25. i 43. Zakona, donijela rješenje kao u dispozitivu.

Odluka Komisije bit će objavljena na službenoj Internet stranici Komisije.

POUKA O PRAVNOM LIJEKU:

Shodno članu 37. stav (1) Zakona, ovo rješenje je konačno u upravnom postupku i protiv istog nije dopuštena žalba, ali se može pokrenuti upravni spor u roku od 30 dana od dana dostavljanja rješenja, tužbom pred Osnovnim sudom Brčko distrikta Bosne i Hercegovine.

Predsjednik
Komisije za odlučivanje o sukobu interesa

Admira Mujić, dipl. pravnik

Dostavljeno:

1. Lj.Đ., [REDACTED] broj [REDACTED], Brčko distrikt BiH
2. Internet stranici Komisije,
3. Evidenciji i
4. Arhivi.